

Tazama Juu!

Watulizeni mioyo, watulizeni mioyo, watu wangu, asema Mungu wenu. Semen na moyo wa Yerusalemu, kauambieni kwa sauti kuu ya kwamba vita vyake vimekwisha, uovu wake umeachiliwa. Isaya 40:1, 2.

Katika siku za giza kuu za mapambano yake marefu na uovu, kanisa la Mungu limepewa mafunuo ya kusudi la milele la Yehova. Watu Wake wameruhusiwa kutazama ng'ambo ya majaribu ya sasa wapate kuona ushindi wa siku zijazo, wakati ambapo vita vikiwa vimekwisha, waliokombolewa wataingia kuimiliki nchi ya ahadi. Maono haya ya utukufu wa wakati ujao, mandhari iliyooneshwa na mkono wa Mungu, yapasa kuwa ya thamani kubwa kwa kanisa Lake leo, wakati pambano la zama zote linafungwa kwa haraka na baraka zilizoahidiwa zinakaribia kutimizwa katika ukamilifu wake wote.

Kwetu sisi ambao tunasimama kwenye ukingo kabisa wa utimilifu wa hayo, maelezo haya ya kinaganaga ya wakati ujao yana umuhimu mkuu kiasi gani, shauku hai ilioje—matukio ambayo kwa ajili yake, tangu wazazi wetu wa kwanza walipogeuza hatua zao kutoka katika Edeni, watoto wa Mungu wamekesha na kuyangojea, wameyatamani sana na kuomba kwa ajili yake!

Msafiri mwenzangu, bado tuko katikati ya vivuli na misukosuko ya shughuli za dunia; lakini hivi karibuni Mwokozi wetu atatokea kuleta wokovu na pumziko. Kwa imani na tuutazame wakati ujao uliobarikiwa kama ulivyooneshwa na mkono wa Mungu. Yeye aliyekufa kwa ajili ya dhambi za ulimwengu anafungua malango ya Paradiso kwa ajili ya wote wamwaminio. Hivi karibuni vita vitakuwa vimekwisha, ushindi umepatikana. Hivi karibuni tutamwona Yeye ambaye tumeweka juu Yake tumaini letu la uzima wa milele. Na katika uwepo Wake majaribio na mateso ya maisha haya yataonekana kama si kitu. Mambo ya zamani "hayatakumbukwa, wala hayataingia moyoni." "Basi msiutupe ujasiri wenu, kwa maana una thawabu kuu. Maana mnahitaji Saburi, ili kwamba mkiisha kuyafanya mapenzi ya Mungu mpate ile ahadi. Kwa kuwa bado kitambo kidogo sana, Yeye ajaye atakuja, wala hatakwia." "Israeli wataokolewa... kwa wokovu wa milele: ninyi hamtatahayarika wala kufadhaika, milele na milele."

Tazama juu, tazama juu na hebu imani yenu na iongezeke daima. Hebu imani hii na iwaongoze katika njia nyembamba inayoongoza kupitia katika malango ya mji hadi ng'ambo kwenye mustakabali mkuu, mpana, usio na mipaka wa utukufu ambao ni kwa ajili ya waliokombolewa.